

दिनांक 23.09.2024

समय: 18.45 बजे

- रक्षामंत्री राजनाथ सिंह जयपुर मांय सैनिक स्कूल रो औपचारिक उद्घाटन कीनो-कह्यो-फौज ने मजबूत बणावण मांय सैनिक स्कूलां मांय खास काम।
- सुप्रीम कोर्ट बच्चां ऊं जुड्या अश्लील विडियो देखण ने पॉक्सो कानून रो उल्लंघन बतायो।
- सूचना अर प्रसारण अर रेल मंत्री अश्विनी वैष्णव रो काल प्रदेश रो दौरा करण रो कार्यक्रम-वे कोटा रेल मण्डल मांय रेलवे लेणां री सुरक्षा प्रणाली कवच री जांच करेला।
- जैसलमेर, जोधपुर अर बाड़मेर रा कुछ हलकां मांय ई चौमासा री बिरखा बंद व्हेवण लाग्यी-ऊगणी हलकां मांय करीब एक सप्ताह ताई चौमासा री बिरखा चालती रेहवण रा आसार।

000

रक्षामंत्री राजनाथ सिंह कह्यो है के फौज ने मजबूत बणावण मांय सैनिक स्कूल खास काम कर रह्या है। वे आज जयपुर मांय खोली ज्या नुवा सैनिक स्कूल रा उद्घाटन जळसा मांय बोल रह्या हा। रक्षा मंत्री कह्यो के राजस्थान री धरती संस्कृति अर हिम्मत ऊं जाणी जावे है, जो देश ने केई बहादुर फौजी दीना।

000

रक्षा मंत्री कह्यो के भणाई-लिखाई देश रा विकास री बुनियादी चीज है। वे कह्यो के ई सैनिक स्कूल ने विद्यार्थियां री भणाई सारू जूना लड़ाकू जहाज, टैंक अर दूजी ज़रूरी सामग्री मुहैया करावण री कोशिश करी जावेला। ई सैनिक स्कूल मांय मौजूदा शैक्षणिक साल मांय भणाई सरू व्हे ग्यी है। आ गैर-सरकारी संगठनां, राज्य सरकारां अर गैर-सरकारी स्कूलां सागे मिल र देशभर मांय 100 नुवा फौजी स्कूल खोलण री सरकार री सोच रो हिस्सा है। रक्षा मंत्रालय सरकारी अर गैर-सरकारी हलकां कानी ऊं मिल र 45 नुवा सैनिक स्कूलां ने मंजूरी दीनी है। कार्यक्रम मांय उपमुख्यमंत्री दिया कुमारी अर सैनिक कल्याण मंत्री राज्यवर्द्धन सिंह राठौड़ समेत जनता रा केई नुमाइंदा अर मान्योड़ा लोग मौजूद हा।

000

सुप्रीम कोर्ट बच्चां ऊं जुड्या अश्लील विडियो देखण ने पॉक्सो कानून रो उल्लंघन बतायो है। अदालत देश री सगळी अदालतां ने किण ई भांत रा कानूनी हुकम या फैसला मांय चाइल्ड पोर्नोग्राफी शब्द काम नी लेवण बाबत कह्यो है। सुप्रीम कोर्ट आज ओ हुकम मद्रास हाईकोर्ट रा एक फैसला ने रद्द करता थकां दीनो। मद्रास हाईकोर्ट बच्चां ऊं जुड्या अश्लील विडियो देखण ने पॉक्सो कानून रा दायरा मांय नी मान्यो हो। न्यायमूर्ति जे.बी. पारदीवाला चाइल्ड पोर्नोग्राफी री ठोड़ बाल यौन शोषण और दुर्व्यवहार सामग्री-सीएसईएम शब्द काम लेवण री राय दीनी।

000

राज्यपाल हरिभाऊ बागडे कह्यो है के संता री जिंदगी ऊं आदर्श जिंदगी री सीख मिले है। वे आज जयपुर मांय श्री गोपाल मंदिर मांय पूजा-अर्चना कर र देश अर राज्य री जनता री खुशहाली री कामना कीनी। राज्यपाल चक्रधर स्वामी अर गोविन्द प्रभु रा अवतार उत्सव माथे वां री सीख ऊं प्रेरणा लेवण री ज़रूरत बतायी।

000

केन्द्र सरकार थोक बाजार मांय कांदा रो मोल कम करण सारू और कांदा बाजार मांय ला रही है। उपभोक्ता मामलात सचिव निधि खरे आज नई दिल्ली मांय आ जाणकारी दीनी। वे बतायो के बफर स्टॉक मांय कांदा री पर्याप्त मात्रा मौजूद है अर खरीफ मौसम मांय कांदा री चोखी बुआई व्ही है। वे कांदा रो मोल बेगो ई कम व्हेवण रो भरोसो जतायो। उपभोक्ता मामलात सचिव कह्यो के सरकार खुदरा बाजार मांय 35 रुपया प्रति किलोग्राम री रियायती रेट ऊं कांदा मुहैया करा रही है अर ई सप्ताह ऊं राज्यां मांय रियायती रेट माथे कांदा री बिकी सरू कर दी जावेला।

000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय

खास श्रृंखला चलायी ज्यी है। इण मांय आज पेश है वन, पर्यावरण अर जलवायु परिवर्तन मंत्रालय कानी ऊं हासिल करी जी अन्तर्राष्ट्रीय उपलब्धि री जाणकारी।

केन्द्र इंटरनेशनल बिग कैट अलायंस-आईबीसीए बणावण सारू ढांचागत समझौता माथे सही कर र ई गठजोड़ रो सदस्य देश बणबा रा भारत रा प्रस्ताव ने मंजूरी दीनी है। ई पाछे भारत आईबीसीए रो संस्थापक सदस्य बण गयो है। बिल्ली पिरवार रा सात मोटा सदस्यां मांय बाघ, शेर, तेंदुआ, हिम तेंदुआ, प्यूमा, जगुआर अर चीता भेळा है। भारत मांय आं मांय ऊं पांच मोटा जिनावर बाघ, शेर, तेंदुआ, हिम तेंदुआ अर चीता मिले है। इंटरनेशनल बिग कैट एलायंस एक दूजा रा फायदा सारू सदस्य देशां बीचे मदद बधावेला।

000

सूचना अर प्रसारण अर रेल मंत्री अश्विनी वैष्णव रो काल प्रदेश रो दौरा करण रो कार्यक्रम है। वे काल जयपुर मांय भारतीय जनता पार्टी रा जयपुर ज़िला रा शहरी कार्यकर्तावां सागे बातचीत करेला। ई पाछे वां रो भाजपा रा राज्य महिला मोर्चा कानी ऊं राख्या जावण वाळा सदस्यता अभियान मांय शिरकत करण रो कार्यक्रम है।

रेल मंत्री काल जयपुर ऊं सवाईमाधोपुर बीचे रेल री पटरियां रो निरीक्षण करेला। रेल मंत्री सवाईमाधोपुर ऊं बूंदी ज़िला रा सुमेरगंजमंडी ताई रेल रा इंजन मांय सफर कर र रेल री पटरियां री हिफाजत री तरकीब कवच री जांच करेला। रेलवे रा कोटा मण्डल मांय कोटा ऊं सवाईमाधोपुर बीचे रेलवे लेण सुरक्षा प्रणाली कवच 4.0 वाळी पैली लेण बण गयी है। मंत्री वैष्णव सुमेरगंज मण्डी ऊं दिल्ली ताई रेलवे लेण रो ई निरीक्षण करेला।

000

10वों राष्ट्रमंडल संसदीय संघ भारत क्षेत्र सम्मेलन लोकसभा अध्यक्ष ओम बिरला री सदरत मांय आज नई दिल्ली मांय सरू व्हयो। बिरला ई संगठन रा अध्यक्ष है। सम्मेलन मांय राज्यां अर केंद्र रा राज वाळा प्रदेशां रा विधानमंडलां रा पीठासीन अधिकारी, सभापति, अध्यक्ष अर उपसभापति सिरकत कर रह्या है। सम्मेलन रो मुद्दो "सतत और समावेशी विकास प्राप्त करने में विधायी निकायों की भूमिका" राख्यी ज्यो है। ई मौके लोकसभा अध्यक्ष ओम बिरला बदलता बगत मांय जनता री उम्मीदां माथे खरा उतरण सारू देश रा विधायी निकायां ने और मजबूत बणावण री जरूरत माथे जोर दीनो। वे कहयो के प्रौद्योगिकी अर संचार माध्यम आम जिंदगी रो हिस्सो बण ग्या है। मौजूदा दौर मांय 31 सदस्य शाखावां वाळो ओ संगठन साल 2004 मांय बणायी ज्यो हो। भारत मांय ओ सम्मेलन दूजी दफा राख्यो जा रह्यो है।

000

57वीं अन्तर रेलवे निशानेबाजी होड़ आज जयपुर मांय सरू व्ही। उत्तर पश्चिम रेलवे री ओर ऊं राख्यी जा रही ई होड़ रो उद्घाटन रेल अर खाद्य प्रसंस्करण उद्योग राज्य मंत्री रवनीत सिंह कीनो। ई मौके मंत्री रवनीत सिंह खेलां अर खिलाडियां ने बधावो देवण सारू रेलवे री सराहवणा कीनी।

000

27 सितम्बर ताई चालण वाळी ई होड़ मांय राष्ट्रीय अर अन्तर्राष्ट्रीय स्तर रा खिलाड़ी सिरकत कर रह्या हैं। पेरिस ओलम्पिक 2024 मांय कांसा रो तमगो जीतण वाळा स्वप्निल कुसाले अर चौथी ठोड़ हासिल करण वाळा अर्जुन बबूता सागे एशियाई खेलां अर राष्ट्रमण्डल खेलां मांय सिरकत करण वाळा खिलाडियां समेत करीब 120 खिलाड़ी ई होड़ मांय सिरकत कर रह्या है। राज्य स्तर री स्कूली विद्यार्थियां री 68वीं हैंडबॉल होड़ आज डूंगरपुर मांय पूरी व्हे गयी। लड़कियां रा वर्ग मांय टोंक अर लड़कां रा वर्ग मांय गंगानगर री टीम चैम्पियन बणी। होड़ रा समापन जळसा मांय डूंगरपुर रा विधायक गणेश घोगरा अर दूजा पावणा जीतण वाळी अर दूजा नम्बर माथे रेहवण वाळी टीमां ने ईनाम दीना। जिला स्तर री 68वीं सॉफ्टबॉल अर रग्बी होड़ आज डीग मांय सरू व्ही। टूर्नामेंट मांय 8 टीमां रा 112 खिलाड़ी सिरकत कर रह्या है। सहारई री सरकारी स्कूल मांय तीरंदाजी, राइफल ऊं निशाणो लगावण अर साइकल चलावण री होड़ां सरू व्ही। चूरू ज़िला रा राजलदेसर मांय ज़िला स्तर री तीरंदाजी होड़ सरू व्ही। पांच दिन री ई होड़ मांय जिला रा 85 ऊं बत्ता खिलाड़ी सिरकत कर रह्या है।

000

जैसलमेर, जोधपुर अर बाड़मेर रा कुछ हलकां मांय चौमासा री ई रूत री बिरखा अब लगभग खत्म व्हे गयी है। सामान्यतः 17 सितम्बर ऊं बिरखा बंद व्हे जावे है पण ई दफा 6 दिन मोड़ी बंद व्ही है। ई बीचे प्रदेश रा ऊगणी हलकां मांय हाल ई चौमासा री बिरखा व्हे रही है। दूजी कानी राज्य मांय घणखर ठोड़ां बिरखा रूक जावण ऊं पारो ओजू चढ़बा लाग्यो है। आज केई ठोड़ां पारो 40 डिग्री सैल्सियस ताई पूग ग्यो, ज्यीं कारण गर्मी रो असर ओजू बध ग्यो। मौसम केन्द्र जयपुर रा निदेशक राधेश्याम शर्मा बतायो के राज्य रा ऊगणी हलकां मांय हाल ताई करीब एक सप्ताह और चौमासा री बिरखा रा आसार है।